

Regional News Unit AIR Aizawl
Friday, September 20, 2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- ‘Bana Kaih Scheme 2024’ chu Chief Minister Pu Lalduhoma’n a tlangzarh a, Mizorama thlai 4 bakah Kolasib leh Mamit District chhunga Buh tharte chu kg khat cheng 30 zelin an lei dawn tih a sawi bawk.
- Kawnpui daia kawng bal avanga nitin mamawh tangkhangte phurh luh dan ngaihtuahin Supply Minister Pu B. Lalchhanzovan helai hmun hi a tlawh.
- Prime Minister Narendra Modia chuan BJP an sawrkar chhung chuan Jammu & Kashmir-ah Article 350 leh Article 35A te chu lak kir leh a ni lo ang a ti.
- European Union chuan tunhnaia Europe-a tuilian tuar nasa ramte tanpui nan euro tluklehdingawn 10 a pe dawn.



HAND HOLDING POLICY

Mizoram sorkar hmalakna lian ber ni tura duan, ‘Bana Kaih (Mizoram Hand-holding) Scheme 2024’ chu nimin khan Chief Minister Pu Lalduhoma’n a tlangzarh a, an intiam tawh angin thlai thar pali an lei dawn tih sawiin, chumi atan chuan pawisa pawh an dah tawh, a ti a. Kuminah hian a bul tan nan Kolasib leh Mamit District chhunga Buh tharte chu kg khat cheng 30 zelin an lei nghal dawn tih a sawi bawk.

‘Bana Kaih Scheme’ hi Aizawl Vanapa Hall-ah tlangzarhin Chief Minister chuan, thawkrim, taima leh tumruhte tan Mizoram sorkar a ding dawn, a ti a. Sorkar hmalakna dawng tur leh chang turin party induhsakna leh party-a inziah luh kher a ngai dawn lova, party mi ten thlang loin a thlang tur bika ruat ten endikin an thlang thin dawn a ni, a ti a. Bana Kaih chu hun rei tak atanga an lo suangtuah tawh ni mah se sorkarna an chan har avangin an kalpui har tih pawh sawiin, Pathianin a hun takah Kalphung Thar Mipui Sorkar a tun dinsak a ni, a ti.

Chief Minister chuan, an intiam tawh angin thlai thar pali an lei dawn tih sawiin, Sawhthing leh Aieng te Geographical Indication (GI) Tag an ti fel tawh a, khawvel hmun hrang hrang atang pawhin Mizoram thar a ni tih a hriat theih dawn niin a sawi a. Nakinah chuan QR Code pawh siam tum a nih thu sawiin hei hi Mizoram thlai thar bik chhinchhiah theihna tur a ni, a ti.

Thlai thar 4 te society kaltlanga lei tura ruahmanna duan a nih thu pawh sawiin, society chu politics tel lo, hruaitu tha leh mi thahnemngaite kaihhruai a ni tur a ni, a ti. Rate tha zawk Rs 50/- chunglama sawhthing hralh theite chu sawrkarin a buaipui dawn lova, Rs. 50/- tling lova an hralh erawh chuan a tlin lohna zat kha sawrkarin a hnawkhah sak thung ang, a ti.

Pu Lalduhoma chuan, kuminah hian a bul tan nan Kolasib leh Mamit District chhunga Buh tharte chu kg khat cheng 30 zelin an lei nghal dawn tih sawiin.. District pahnih an thlan chhan chu sokar tlin tawk a ni rih tih sawiin, kum thar atang chuan zau leh lian zawka hmalak tum a ni, a ti a; buh tui chi chin tur niin a theih chuan Ration Buhfaiah pawh Mizo thar ngei pek theih tum a ni, a ti.

Agriculture & Farmers Welfare Minister Pu PC Vanlalruata pawhin thu sawiin, Mizorama sorkarna chang tawh hrang hrang ten ram a dam theih nan damdawi hrang hrang an chawh thin a, sorkar kal hmasa te khan theihtawp an lo chhuah tawh thin a. ZPM pawhin kut hnathawk leh Entrepreneur te khai chhuah a duh a, chumi atan chuan Bana Kaih hi a duang a ni, a ti.

Mizoram State Policy Coordination Committee (MSPCC) Member Secretary Pu Lalmalsawma Pachuau sawifiah dan chuan, Bana Kaih thil tum chu hmasawna tlo leh tuantling hmanga Mizoram chu state changkanga hlan kai a ni a. Mi pakhatin kum khat chhunga chawhruala a lak luh zat (Capita Income) tihsan tum niin, tun dinhmunah Mizoram Per Capita Income chu Cheng Nuai 2 leh Sing 4 vel anga chhût a ni a, ram changkang te chu Cheng Nuai 80 vel bawr a ni thung.

Bana Kaih hi ZPM kaihhruai Mizoram sorkarin puih tlak te khai chhuah theihna tura ruahmanna a siam a ni a, Cheng Nuai 50 thleng Loan dil theih a ni a; India khua leh tui dik tak - kum 18 chung lam Mizorama cheng nghette tan dil theih a ni a, Mizoram sorkar emaw sorkar laipui emaw hnuaiia thawk tan erawh dil theih a ni lo.

A kengkawh turin sorkar Department hrang hrang 16 ruat an ni a, scheme hian Mizoram chhunga District hrang hrang 11 a huam vek ang. Loan la zinga a pung rul tha te chu Mizoram sorkarin a pung a pe let dawn a. Loan la turin dahkham a ngai dawn lo va, sorkar chu Guarantor a ni ang. Loan rul tha lo te erawh sorkarin a rulhsak dawn lo thung. Chief Minister sawi dan chuan Loan atan hian Bank hrang hrang SBI, MRB leh Apex Bank te nen inremna an ziaak dawn a ni.



SUPPLY MINISTER

Supply Minister Pu B. Lalchhanzova chuan Kawnpui daia kawng bal avanga nitin mamawh tangkhangte phurh luh dan ngaihtuahin Kawnpui daia harsatna thlenna hmun nimin khan a tlawh a. Mipuite nitin mamawh mumal taka phurh tlang a nih theih nan Kawnpui Police Station-ah khawtlang hruaitute leh Pu Lalduhthlanga, EE, PWD bakah Kolasib District Truck Owners' Association ten nen sawiho a ni.

Supply Minister Pu B. Lalchhanzova chuan chatlaklova nitin mamawh phurh luh a nih zel theih nan sawrkarin hma a lak zel thu sawiin mipuite chu chia mai lo turin a chah. Sawrkarin a tul ang zelin ruahmanna a siam dawn a ni a ti.

Supply Minister hi Pu Zadailova, Supply Dept Joint Director leh DCSO, Kolasib ten an tawiawm a ni.



AIZAWL DC

Aizawl DC Pu Lalhriatpuia hovin nimin khan DC pisaah Sairang Dinthar khawtlang hruaitute nen district hotulu hnena an thuthlen ngaihtuahin Sairang a rel kawng siamtu NF Railway aiawhte nen an thukhawm.

Sairang Dinthar VC chuan DC hnenah hian thu thlenin, FCI kudam sak mek kaltlanga vantlang kawng rei tak an lo hman tawh, Kangtek Kawng chu railway construction company ten bungraw phurh nan an tawm avangin leh a bulhnai mimal ram pawh an nek tel avanga khawtlang mi tam tak eizawna leh in leh lo in a tawrh phah thu thlenin, hmalak sak turin an ngen a. Hemi chungchang hi uluk taka sawihovin railway construction company te chuan October ni 20, 2024 thleng hun pe turin an ngen a, chumi chhung chuan kawng siam hna leh a tul dangte theihtawp chhuaha an lo thawh tur thu an tiam a ni.

Hemi bakah hian railway construction company lamin rel kawng atana ram an lei tawh chhungah mimal dawr te siam pakhat a awm avanga hna a thuanawp thu meeting ah hian an thlen bawk a. Aizawl DC, District Magistrate ni bawk chuan dawr siamtu chu a rang thei ang bera titawp turin leh, September ni 30, 2024 hnuah an la inthiarchhuah loh chuan thiah sak a nih tur thu a ti tlu nghal a ni.



IIMC AIZAWL

Hindi hmang uar tura inzirtirna Hindi Pakhwada chu IIMC North East Regional campus Aizawl ah hman a ni a.

Akashvani Guwahati News Editor Manas Pratim Sarma leh Kurseong ten an hmanpui a, IIMC Aizawl Regional Director Dr. Sushil K Singh leh faculty member te nen hun hmangin, Essay leh poetry competition te buatsah a ni a,

Hemi hnu hian meeting nei chhunzawmin, Hindi tawng pawimawhna, official leh nitin khawsak phunga Hindi pawimawhna te an sawiho a ni.



HACHHEK MLA

Hachhek Bialtu MLA Robert Romawia Royte chuan nilaini khan a bial chhunga Kawngpui pawimawh zual te chhiat dan enfiah pahin khaw hrang hrang a tlawh a.

Pu Robert Romawia Royte chuan, Heti tak maia Mizoram chhunga Kawngpui dung a chhiat chhan chu ZPM Sawrkar in hmahlir a neih thiam loh vangah puhin, hetiangka Kawngpui chhiat avanga harsatna namen lo thleng tur hi Sawrkar fing chuan a thlir lawka, sum awm chhun ang ang hmangin a cheibawl thin a ni ngai a, tuna sawrkar i chuan a ngaihthah rei deuh hlek a ni, a ti.

ZPM Sorkar chuan hma lam thlira hmasawn tum lovin, sorkar hmasa tihdik loh zawngin hnunglam hawiin a kal a, tun hi an thlenpui ta a nia sawiin SASCI Part-I sum sanction sa cheng nuai 23331 an tih lapse chhan pawh MNF Sawrkar tih dik loh thlira Hnunglam an hawi rei lutuk vang a ni, tih sawiin Sum lapse pawh zia hi thla 10 zet an sorkar hnu hian an hmuchhuak tan ve mek chauh a ni, a ti bawk.

Pu Robert Romawia-a chuan ZPM Sawrkar chu Nationalism rilru an pu tawk lo ni a sawiin Hachhek bial chhunga Phuldungsei khua chhungkaw eng emaw zat an Ration card te an delete sak chuan Hnam thila Sawrkar ngawng zia a ti lang niin a sawi.

Phuldungsei khua hi Jampui Tlangdunga awm niin a khawlai a kaltlang kawngpui chu Mizoram leh Tripura inrina a ni a, he khaw mipui tam zawk hi Mizoram chan a ni chungin Tripura Sawrkarin a pumhluma neih tuma a beih ruk reng lai a nih avangin, Mizoram Sawrkar in ration Card a paih saka, Mizorama quota an neih loh chuan Tripura chan lamah an bet zui mai ang tih a hlauhthawn awm a, Mizoram tan Ram leh mi leh sa channa a thlen palh thei a ni, a ti.

Kuhva chin chungchanga zawhna chhangin MLA chuan, Chief Minister in Kuhva chin khap ang a a sawi chu thu belhchian dawl lo a ni a ti a. Director of Arecanuts & Spices nen tunhnaia an inkawm naah, Kuhva hi India ram thlai chin pawimawh te zinga pakhat, Indian economy chawisanga ti lartu a ni a. India ramah Kuhva chin khapna hi a awm lo a ti.

MLA chuan Hachhek Bial mipuite eizawna pui ber Kuhva tam hrî chungchang zirchiang turin Hachhek Bial Kuhva Chingtu Pawl (HBKCP) te nen hma lak ho an tum thu a sawi.



PM

Prime Minister Narendra Modia chuan BJP an sawrkar chhung chuan Jammu & Kashmir-ah Article 350 leh Article 35A te chu lak kir leh a ni lo ang a ti. Katra leh Srinagar-a a campaign-naah he thu hi sawiin Pu Modia chuan heng dan te hi a bo kumkhua tawh dawn tih a sawi a. BJP chuan Parliament-a an intiam angin J&K chu state nihna an pe leh ang a ti a. Assembly inthlan thawhkhatnaa mi tamtakin vote an thlak chu lawmawm a tih thu a sawi a ni.



UNION HOME MINISTER

Union Home Minister leh Cooperation Minister Amit Shah chuan White Revolution 2.0 chuan hmeichha dinhmun chawikan, naupang chaw tha tlakchham tihltlem, hna thar siam, organic farming tih changtlun leh lei tha luangral ven kawngah nasa takin a pui dawn a ti. Nimina New Delhi-a a ministry in ni 100 chhung an hnathawh pholanna national-level conference ah he thu hi sawiin Idnia chu tunah hian khawvela bawngnhute siamchhuak hnem ber ram a ni a ti a. Bawngnhute tharchhuahnaah hmeichhiate an thawk nasa tih sawiin Gujarat ah ringawt cheng vaibelchhe sing 6 hu an thawkchhuak a ni a ti.

He hunah hian Union Minister of Fisheries, Animal Husbandry, Dairying and Panchayati Raj Rajiv Ranjan Singh pawh a tel a ni.



EU FLOOD RELIEF

European Union President Ursula von der Leyen chuan tunhnaia Europe-a tuilian tuar nasa ramte tanpui nan EU chuan euro tluklehdingawn 10 a pe dawn tih a puang. Nimina Wroclaw-a an inhmukkhawmnaah he thu hi sawiin kum 10 chhunga tuilian rapthlak ber an tuar a ti a. He inhmukkhawmah hian Polish PM Donald Tusk, Czech leh Slovakian Prime Minister bakah Austrian Chancellor te pawh an tel a ni.

Pi von der Leyen chuan chanchinbumite kawmin EU chuan heng tuillian tuarte indinthar lehna turin hun rei tak chhung a chhawmdawl dawn a ti bawk.

Tunhnaiah Europe-ah tuilian avangin ram engemzawzatina harsatna an tawk a. Poland chu a tuar nasa ber ram niin khawpui chhunga in leh lo tam tak a chhia a. Mi tam tak hmun him lamah sawn chhuah niin mi pasarih an thi a ni.

Poland bakah hian Czech Republic, Slovakia leh Austria te pawhin tuilian hi an tuar bawk a ni.

